



**Aalisarnermut, Piniarnermut Nunalerinermullu Naalakkersuisoq
Landsstyremedlem for Fiskeri, Fangst & Landbrug**

Hr. Inatsisartunut ilaasortaq Jens B. Frederiksen
Maani

**Aalisarnermut, Piniarnermut Nunalerinermullu Naalakkersuisup Kalaallit
Nunaata IWC-mit aninissaa pillugu oqaaseqaatai pillugit Naalakkersuisunut
apeqquteqaammut akissuteqaat (nr. 83)**

J.nr. 01.28/2008-83
3. oktober 2008
Postboks 269
3900 Nuuk
Oq/tel +299 34 50 00
Fax +299 32 47 04
aapip@gh.gl
www.nanoq.gl

Naalakkersuisoqarfima 23. september 2008 Naalakkersuisunut apeqqutit tiguua, Kalaallit Nunaat IWC-mit aninissaanik qallunaat nunanut allanut ministeriannut inassuteqarsimanermik oqaatigineqarsimasoq kiisalu Inatsisartut Aalisarnermut, Piniarnermut Nunalerinermullu Ataatsimiititaliaanut saqqummiun- neqarsimanginnera pillugit.

Aallaqqaasiullugu ilisimatitsissutigissavara ilaatigut Naalakkersuisut imaluunniit Naalakkersuisunut ilaasortat ataasiakkaat apeqqutinik uani pineqartunik Inatsisartut aqqusaaqqaangikkaluarlugit misissuisitsinermik aallartitsinissamut pisinnaatitaaffeqartut. Ilaatigullu nunanut allanut ministeri inannikuunngikkiga Kalaallit Nunaata IWC-mit aninissaa akuersissutigiteqqullugu. Soorlu allakkatigut 15. september 2008-meersukkut Inatsisartunut ilisimatitsinikuusunga Nunanut Allanut Ministeri qinnuvigaara suleqatigiissitaliamik pilersitseqqullugu Kalaallit Nunaata IWC-mit piaartumik aninissaq eqqarsaatigalugu Qallunaat Nunaata nalunaaruteqarsinnaanerani misissuisussamik, pisinnaappallu kommissionip aappaagu ataatsimiinnginerani.

18. september 2008 nunanut allanut ministerip akissutaa tiguara. Nunanut allanut ministerip akissutaa ilisimatitsissutitut ilanngullugu nassiunneqarpoq.

Ad 1) Aalisarnermut, Piniarnermut Nunalerinermullu Naalakkersuisup Kalaallit Nunaata IWC-mit aninissaanik kissaateqarneranut suut tunngavigineqarpat?

Nunanut Allanut Ministerimut allakkama assilinera Aalisarnermut, Piniarnermut Nunalerinermullu Ataatsimiititaliap tiginikuuaa, tassanilu suleqatigiissitaliamik pilersitsinissamut immikkoortut tunngavilersuutit pingaernerit nassuiarneqarput. Annertunerusumik itisiliinissaq annertuvallaassaaq, aammalu tekniikkimut oqaluttuarisaanermullu tunngasunik imaqaassalluni, tassa IWC-ip ingerlalluannnginneranut pissutaasut amerlammata.

Ad 2) Aalisarnermut, Piniarnermut Nunalerinermullu Naalakkersuisup taamatut kissaateqarneranut Naalakkersuisut tamarmiullutik isumaqataanerit tunuliaqutigineqarpat?

Suliaq Naalakkesusuisuni pisortatigoortumik oqallisigineqanngilaq, tassa suleqatigiissitaliamik pilersitsinissamik siunnersuut suli teknikkikkut ingerlanneqarmat, taamaattumik Naalakkersuisuni suliarineqarnissaanut suli piareerani. Suleqatigiissitaliap suliaa naammassippat nalunaarusiap tiguneqarnissaa naatsorsuutigineqarpoq.

Ad 3) Aalisarnermut, Piniarnermut Nunalerinermullu Naalakkersuisup kissaateqarneranut Naalakkersuisunut illuatungiliuttut tamatumunnga isumaqataappat?

Naalakkersuisut uanniit ilisimatinneqarput. Naalakkersuisut aammattaaq IWC-mi ukiorpassuarni nikeriarsinnaasimannginneq ilisimalluinnarpaat. IWC-mi ineriartorneq IWC-llu kalaallit piumasaqaataannut isumaqartarnera pillugit Naalakkersuisut ingerlaavartumik ilisimatinneqartarput, pisassiissutissatut kissaatigineqartut kisiisa pinnagit, kisiannili aamma piumasaqaatit allat annertusiartortut pillugit.

IWC-mut attaveqarnitta nalilersornissaanik isumaq nutaajunngilaq. Maannakkut suliniut aallartitara qipoqqartassanneqarnissap akuersissutigineqanngineranik taamaallaat pissuteqanngilaq.

IWC-mi aalajangersakkat malillugit EU IWC-mi ilaasortaasinnaangilaq. IWC-mi ilaasortat EU-meersut nunat 22-upput. IWC-mi ataatsimut taasisarnissamik sunullu tamanut ataatsimut isummertarnissamut EU-p ukioq manna pisinnaatitsineratigut IWC-mi "pissaaneqarneq" allanngorluinnarnikuuvoq. Tamanna ilaatigut kinguneqarnikuuvoq nunat Kalaallit Nunaannut pisassiissutissanik akuersisartut itigartitsisariaqarsimanerannik. Taamatut pisoqarnera kisiat eqqarsaatigigaanni IWC-mi suliassat nalinnginnaasut ingerlanneqarnissaat ajornakusoortorujussuanngornikuuvoq, apeqqutit Kalaallit Nunaannut tunngasut kisiisa eqqarsaatiginagit, kisiannili suliat taasissutigineqartussaasut tamaasa eqqarsaatigalugit.

Pissutsit ajornakusuulerput Qallunaat Nunaat EU-mi ilaasortaammat, naluneqanngitsutullu Kalaallit Nunaat ilaasortaangilaq. Naalagaaffeqatigiineq innersuussutigalugu Kalaallit Nunaata nunanut allanut tunngatillugu soqutigisai Qallunaat Nunaata ingerlattussavai, taassuma ataani IWC-mi. Taamaalliluni Qallunaat Nunaat ajornartorsiulerpoq, EU ataatsimut isummertarnissamik aalajangermat. Qallunaat Nunaatali OLT-mik aqqissuussineq innersuussutigalugu Kalaallit Nunaata soqutigisai ingerlassinnaavai. Pissusiulersorli piffissaq sivisunerusoq eqqarsaatigalugu Qallunaat Nunaannit Kalaallillu Nunaannit attatiinneqarsinnaangilaq. IWC-mi nunat 82-t ilaasortaapput, tunngaviummik aalajangigassat $\frac{3}{4}$ -mik amerlanerussuteqarnikkut aatsaat akuersissutigineqarsinnaapput. EU-mi ataatsimut isummertarnissamut aamma ukioq manna EU'p itigartitsineranut sulianut allanut tunngatillugu Kalaallit Nunaata soqutigisaminik ingerlatsinissaanut ajornartorsiutaassaaq.

Ad 4) IWC-mit aninissami iluaqutissat suut Naalakkersuisunit isiginiarneqarpat?

Suleqatigiissitaliap sulinini oktobarip ingerlanerani aallartissavaa, ilaatigullu iluaqutissat ajoqutissallu misissussallugit, aammalu Kalaallit Nunaata IWC-mut attaveqarsinnaaneranut periarfissat assigiinngitsut misissussallugit. Taamaammat maannakkut ersarissumik nalunaarutigisinnaangilara IWC-p avataaniinnissaq sunik iluaquteqassanersoq. Kattuffissuarli ingerlalluanngitsorujussuuvoq, ukiorpassuarnilu ingerlalluarnikuunani.

Ad 5) Taamatut sakkortuumik aalajangerneq Inatsisartut Aalisarnermut, Piniarnermut Nunalerinermullu ataatsimiititaliaannut sooq saqqummiunneqanngila?

Isumaqqanngilanga ilaasortaajunnaarsinnaanermik periarfissanik misissuisussamik suleqatigiissitaliorneq sakkortuumik aalajangernerusoq. Akerlianilli suliamik ingerlatsinermi, piviusorsiorluni tunngaveqarluarlunilu nalilersuinissamik kissaaateqarneq aallartitippara, inuit suliamik ilisimasaqartut pingaartumillu IWC pillugu suleqatigiissitaliamik taaneqartartup akuutitinnerisigut

Suleqatigiissitaliami ilaasortaapput IWC-mi kommissionip teknikkikkullu ataatsimiittarnerani ukiuni 20-ni peqataasarnikut, taakkulu siornatigut aallartitanut siuttuusarnikuusunik Kalaallit Nunaanneersunik Qallunaallu Nunaanneersunik kiisalu Savalimmiuneersunik ilaneqarsinnaapput.

Ikinngutinnersumik inuulluaqqusillunga

Finn Karlsen

Aalisarnermut, Piniarnermut Nunalerinermullu Naalakkersuisoq